

بِسْمِ اللّٰهِ الرَّحْمٰنِ الرَّحِيْمِ

আমাদের প্রাণপ্রিয় ইমাম হযরত খলীফাতুল মসীহ আল খামেস (আই.) পূর্বের ধারাবাহিকতা বজায় রেখে গতকাল ২০শে সেপ্টেম্বর, ২০১৯ লক্ষনের বাইতুল ফুতুহ মসজিদে মহানবী (সা.)-এর বদরী সাহাবীদের স্মৃতিচারণ করে খুতবা প্রদান করেন।

হ্যুর আনোয়ার (আই.) বলেন, আজ যে বদরী সাহাবীর স্মৃতিচারণ দিয়ে খুতবা আরম্ভ করব তিনি হলেন, হযরত ইয়ায়ীদ বিন রুকাইশ (রা.)। তিনি কুরাইশ বংশের বনু আসাদ বিন হ্যাইমা গোত্রের লোক ছিলেন এবং বনু আবদে শামসের মিত্র ছিলেন। তার পিতার নাম ছিল রুকাইশ বিন রিয়াব। হযরত ইয়ায়ীদ বদর, উহুদ, খন্দকসহ অন্যান্য সব যুদ্ধে মহানবী (সা.)-এর সহযোদ্ধা হিসেবে অংশ নেন; বদরের যুদ্ধে তিনি তাঙ্গ গোত্রের আমর বিন সুফিয়ান নামক এক ব্যক্তিকে হত্যা করেন। তার ভাই হযরত সাঈদ বিন রুকাইশ নিজ পরিবার-পরিজন নিয়ে মদীনায় হিজরত করেছিলেন, তিনি প্রথম সারির মুহাজিরদের একজন ছিলেন। তার আরেক ভাই হযরত আব্দুর রহমান বিন রুকাইশ উহুদের যুদ্ধে অংশ নেন। তার এক বোন আমিনা বিনতে রুকাইশ মকায় একেবারে প্রথম দিকে ইসলাম গ্রহণ করেন ও মদীনায় হিজরত করেন। হযরত ইয়ায়ীদ দ্বাদশ হিজরিতে ইয়ামামার যুদ্ধে শহীদ হন।

এখানে প্রসঙ্গক্রমে হ্যুর ইয়ামামার যুদ্ধের নাতিদীর্ঘ আলোচনা করেন এবং এর প্রেক্ষাপট ও কারণ বর্ণনা করেন।

এরপর যে সাহাবীর হ্যুর স্মৃতিচারণ করেন তিনি হলেন, হযরত আব্দুল্লাহ বিন মাখরামা (রা.), তিনি বনু আমের বিন লুয়াই গোত্রের লোক ছিলেন। তার পিতার নাম ছিল মাখরামা বিন আব্দুল উয়ায়া ও মাতার নাম বাহনানা বিনতে সাফওয়ান। তিনি প্রথম দিকের মুসলমানদের একজন ছিলেন এবং দু'বার হিজরত করার সৌভাগ্য লাভ করেন। প্রথমবার হযরত জাফরের সাথে আবিসিনিয়ায় হিজরত করেন। পরবর্তীতে মদীনায় হিজরতের সময় হযরত কুলসুম বিন হিদমের বাড়িতে অবস্থান করেন। মহানবী (সা.) তার ও হযরত ফারওয়া বিন আমর আনসারী (রা.)-এর মাঝে ভাতৃত্বের বন্ধন রচনা করে দেন। তিনি বদরসহ পরবর্তী সব যুদ্ধে মহানবী (সা.)-এর সহযোদ্ধা ছিলেন। হযরত আবু বকর (রা.)'র খিলাফতকালে ইয়ামামার যুদ্ধে ৪১ বছর বয়সে তিনি শাহাদত বরণ করেন। তিনি শাহাদত লাভের জন্য ব্যাকুল ছিলেন। তিনি অত্যন্ত ইবাদতকারী ও পরহেয়গার একজন মানুষ ছিলেন। হযরত আব্দুল্লাহ বিন উমর তাকে ইয়ামামার যুদ্ধের দিন রণক্ষেত্রে মুর্মুর অবস্থায় পড়ে থাকতে দেখে তার কাছে গিয়ে দাঁড়ালে আব্দুল্লাহ বিন মাখরামা তার কাছে জানতে চান যে, ইফতারের সময় হয়েছে কি-না? অর্থাৎ তিনি তখন রোয়া ছিলেন। হযরত আব্দুল্লাহ বিন উমর সময় হয়ে গেছে জানালে তিনি তাকে ইফতার করার জন্য একটু পানি দিতে বলেন; ইবনে উমর পানি নিয়ে এসে দেখতে পান যে, তিনি ইতোমধ্যে শাহাদত বরণ করেছেন।

এরপর হ্যুর হয়রত আমর বিন মা'বাদ (রা.)'র স্মৃতিচারণ করেন। তার পিতার নাম ছিল মা'বাদ বিন আয়র। তিনি আনসারদের অওস গোত্রের শাখা বনু যুবায়ার লোক ছিলেন। তিনি বদর, উহুদ, খন্দকসহ সকল যুদ্ধে মহানবী (সা.)-এর সহযোদ্ধা ছিলেন। হনায়নের যুদ্ধের দিন মুসলমান সৈন্যবাহিনী ছত্রভঙ্গ হয়ে পড়লে যে অল্প ক'জন সাহাবী মহানবী (সা.)-এর পাশে অটল-অবিচল ছিলেন, হয়রত মা'বাদ (রা.) তাদের অন্যতম। ঐতিহাসিকদের মতে এরূপ দৃঢ়চেতা সাহাবীর সংখ্যা আশি থেকে একশ'র মধ্যে ছিল।

পরবর্তী সাহাবী হয়রত নু'মান বিন মালেক (রা.); বিভিন্ন স্থানে তার নাম নু'মান বিন কওকাল বলেও উল্লেখ করা হয়েছে, কারণ তার দাদা কওকাল ছিলেন। কওকাল মদীনার সেসব নেতাকে বলা হতো যারা নিরাপত্তা-প্রার্থী বা আশ্রয়প্রার্থীদের নিরাপত্তা বা আশ্রয় প্রদান করতেন। হয়রত নু'মানের পিতার নাম ছিল মালেক বিন সা'লাবা এবং মাতার নাম আমরা বিনতে যিয়াদ, তিনি হয়রত মুজায়ের বিন যিয়াদের বোন ছিলেন। হয়রত নু'মান একটু খুঁড়িয়ে হাঁটতেন। তিনি বদর ও উহুদের যুদ্ধে অংশ নেন এবং উহুদের যুদ্ধে শহীদ হন, সাফওয়ান বিন উমাইয়া তাকে শহীদ করে। তাকে তার মামা হয়রত মুজায়ের বিন যিয়াদ ও আরেকজন শহীদ হয়রত উবাদা বিন হাসহাসের সাথে একই কবরে সমাহিত করা হয়। উহুদের যুদ্ধে রওয়ানা হওয়ার পূর্বে তিনি মহানবী (সা.)-কে বলেছিলেন, ‘হে আল্লাহর রসূল! আমি অবশ্যই জান্নাতে যাব।’ মহানবী (সা.) পরবর্তীতে তার শাহাদতের পর কাশফে বা দিব্যদর্শনে দেখে সাহাবীদের অবহিত করেছিলেন যে, তিনি (সা.) হয়রত নু'মানকে জান্নাতে ঘুরে-বেড়াতে দেখেছেন, আর সেখানে তিনি মোটেও খুঁড়িয়ে হাঁটছিলেন না। হয়রত জাবের (রা.) বর্ণনা করেন, হয়রত নু'মান বিন কওকাল এমন সময়ে মসজিদে প্রবেশ করেন যখন মহানবী (সা.) জুমুআর খুতবা প্রদান করছিলেন; তিনি (সা.) নু'মানকে বলেন, ‘দু'রাকাত নামায পড় এবং সংক্ষেপে পড়।’ এই বর্ণনাটি জুমুআর পূর্বের দু'রাকাত সুন্নত নামায পড়ার গুরুত্বের প্রতি নির্দেশ করে, ইমামের খুতবা প্রদানকালে হলেও তা পড়তে হবে।

সবশেষে হ্যুর হয়রত খুবায়ব বিন আদী আনসারী (রা.)'র স্মৃতিচারণ করেন। তিনি আনসারদের অওস গোত্রের শাখা বনু জা'জাবা বিন অওফের লোক ছিলেন। যখন হয়রত উমায়ের বিন আবু ওয়াকাস হিজরত করে মদীনায় আসেন তখন মহানবী (সা.) হয়রত খুবায়ব বিন আদীর সাথে তার আত্মসন্পর্ক স্থাপন করেন। হয়রত খুবায়ব বদরের যুদ্ধে অংশ নেন, এই যুদ্ধে তিনি হারেস বিন আমেরকে হত্যা করেন। ৪৬ হিজরিতে রাজষ্ঠ নামক স্থানে সংঘর্ষিত কাফিরদের বিশ্বাসঘাতকতার ঘটনায় হয়রত খুবায়ব বিন আদী ও যায়েদ বিন দাসেনা বন্দী হন এবং অবশিষ্ট সাহাবীরা নিহত হন। এই ঘটনা বনু লিহইয়ান ঘটিয়েছিল, যা হ্যুর সংক্ষেপে এখানে তুলে ধরেন। বনু লিহইয়ান হয়রত খুবায়বকে মকায় নিয়ে গিয়ে হারেস বিন আমেরের ছেলেদের কাছে বিক্রি করে দেয়, যারা পিতৃহত্যার প্রতিশোধের ঘণ্ট্য নেশায় তাকে হত্যা করে। তাদের কাছে বন্দী থাকা অবস্থায় একদিন হয়রত খুবায়ব নিজ প্রয়োজনে একটি ক্ষুর চেয়ে নেন। হারেসের এক মেয়ে বর্ণনা করে যে, তার এক শিশু সন্তান সে সময় খুবায়বের কাছে চলে যায় এবং খুবায়ব তাকে নিজের কোলে বসান। এটি দেখে হারেসের মেয়ে যারপরনাই শক্তি হয়ে পড়ে যে, না জানি খুবায়ব আমার মেয়ের

সাথে কী করে বসেন। খুবায়ব তার চেহারায় আতঙ্কের ছাপ দেখে তাকে আশ্ক্ষণ্ট করেন যে, তিনি এমন কিছু করার লোক নন। হারেসের সেই মেয়ে বলত, ‘আল্লাহর কসম! খুবায়বের মত আশ্র্য ভালো বন্দী আমি কক্ষনো দেখি নি। আল্লাহর কসম! একদিন আমি তার হাতে এক থোকা আঙুর দেখেছি যা সে খাচ্ছিল, অথচ সে শিকলে বাঁধা অবস্থায় ছিল এবং তখন মকায় কোন ফলের মওসুমও ছিল না। এটা আল্লাহর কাছ থেকে পাওয়া রিয়ক ছিল যা তিনি খুবায়বকে দিয়েছিলেন।’ যখন হারেসের পুত্র তাকে শহীদ করার জন্য মকার বাইরে নিয়ে যায় তখন তিনি (রা.) শাহাদতের পূর্বে দু’রাকাত নফল নামায পড়ার জন্য সময় চান, তারা অনুমতি দিলে তিনি নামায পড়েন ও নামায শেষে বলেন, ‘যদি আমার মনে এই আশংকা না থাকত যে, তোমরা ভাববে— আমি মৃত্যুভয়ে নামায দীর্ঘ করছি— তাহলে আমি অবশ্যই নামায দীর্ঘ করতাম।’ এরপর তিনি দোয়া করেন, ‘হে আল্লাহ, তুমি তাদের গুণে রেখো এবং তাদেরকে বেছে বেছে হত্যা করো, আর তাদের মধ্যে কাউকে ছেড়ো না।’ আল্লাহ তা’লা তার দোয়া কবুল করেছিলেন, সেই হত্যাকারীদের মধ্য থেকে একজন ছাড়া বাদবাকী সবাই এক বছরের মধ্যেই মারা গিয়েছিল। যে একজন বেঁচে গিয়েছিল, সে হ্যরত খুবায়বের এই দোয়া শোনার সাথে সাথে তায়ে মাটিতে লুটিয়ে পড়েছিল; এজন্য সে রক্ষা পায়। এটি ও বর্ণিত হয়েছে যে, হ্যরত খুবায়ব আল্লাহ তা’লার কাছে দোয়া করেছিলেন যেন তার সালাম রসূলুল্লাহ (সা.)-কে তিনি পৌঁছে দেন; আল্লাহ তা’লা সেই সালাম পৌঁছে দিয়েছিলেন এবং মহানবী (সা.) সাহাবীদের সাথে বসা অবস্থায় সেই সালামের জবাবও দেন। হ্যুর বলেন, হ্যরত খুবায়ব সম্পন্নে আরও কিছু তথ্য রয়েছে যা পরবর্তীতে বর্ণনা করা হবে।

খুতবার শেষদিকে হ্যুর ‘তারীখে আহমদীয়াত’ বা আহমদীয়াতের ইতিহাস বিভাগের নতুন ওয়েবসাইট উদ্বোধনের ঘোষণা দেন যা হ্যুর জুমুআর নামাযের পরে উদ্বোধন করেন। এছাড়া একটি গায়েবানা জানায়ারও হ্যুর ঘোষণা দেন যা জামাতের মুবাল্লিগ মোকাবরম সাফিউর রহমান খুরশীদ সাহেবের, যিনি গত ১৬ই সেপ্টেম্বর ৭৫ বছর বয়সে হৃদযন্ত্রের ক্রিয়া বন্ধ হওয়ার কারণে ইন্তেকাল করেন, ইন্না লিল্লাহি ওয়া ইন্না ইলাইহি রাজিউন। মরহমের পিতা হাকীম ফযলুর রহমান সাহেবও জীবনোৎসর্গকারী ছিলেন, মরহমের নানা হ্যরত মৌলভী কুদরতুল্লাহ সানৌরী সাহেব হ্যরত মসীহ মওউদ (আ.)-এর একজন নিবেদিতপ্রাণ সাহাবী ছিলেন। মরহম দেশে-বিদেশে জামাতের মূল্যবান সেবার সৌভাগ্য লাভ করেছেন। হ্যুর মরহমের স্মৃতিচারণ করেন এবং তার রহের মাগফিরাত ও পদর্ম্মাদা উন্নত হওয়ার জন্য দোয়া করেন। (আমীন)

[প্রিয় শ্রোতামগুলি! হ্যুরের খুতবা সম্পূর্ণ শোনার কখনোই কোন বিকল্প নেই, আমরা সময়ের প্রতি লক্ষ্য রেখে খুতবার সারমর্ম উপস্থাপন করছি মাত্র। আপনাদেরকে হ্যুরের পুরো খুতবাটি শোনার অনুরোধ রইল। হ্যুরের খুতবাটি পুরো শুনতে পাবেন আমাদের এমটিএ’র নিয়মিত ওয়েবসাইট অর্থাৎ, www.mta.tv এবং আমাদের ওয়েবসাইট www.ahmadiyyabangla.org -এ]

আসসালামু আলাইকুম ওয়া রহমাতুল্লাহি ওয়া বারাকাতুহ।